

'S is Faasenacht, s'is Faasenacht

'S is Faasenacht, 's is Faasenacht,
die Kieschelscher werre gebaggd.
Unn wenn mei Mudda kenn Kieschelscher baggd,
dann bloose ma uff die Faasenacht.
So honn mir frieher gesung!



Middem Oba seiner Gaadebux unn da Oma ihrem alde Rock,
es Kabboddhidsche ohn, e fascher Zobb on em Kobb,
so honn mir uns vaboozd, dass uns nur jo kenner kennd;
unn sinn dann mit da gonz Häärd dursch die Stroße gerennd.
E aldi Tasch unn e Räänschirm, so sinn mir los.
Ääns hadd sogaa e Henkelkorb gehadd, zimmlisch groß.
Doo eninn hadd das die Kieschelscher kassierd,
die se uns on de Hausdiere honn spendierd.
Zesomme honn mir dann laud unn deidlich „Donke“ gesaad,
sinn schnell weida, mir honn jo kenn Zeid gehadd.
Mir mussde jo vun Dier ze Dier,
wer nix gewwe wolld, das wussde mir.
Die Kieschelscher ware mol dick, mol dinn, groß odda klään.
Die dinne Krebbade ware nie gefilld gewään.

Faasenacht war meischdens frieh im Februar
unn wie das um die Zeid so war,
wars froschdisch unn kald, dass es nur so krachd.
Doch uns hadd das domols nix ausgemachd.
Monschmol gings gudd unn unser Korb war schnell voll;
dann hamma ewe de greeschde Hudd geholl.
Jetzt war de Bubblesbersch abgegrast.
Ach je, doo hädde ma doch beinaa die Hitt vapassd.
Awwer do misse ma unbedingt heit noch vorbei;
doo gebbds liewe Leit, Schromme und Hardmonns Bäggerei.
Café Pitz-Steesch war aach e guddes Haus.
Dort is kenns vun uns ohne e Täfelsche Galla-Peter enaus.
Kumm, mir misse uns dummele, ojeoje,
es sinn nämlisch noch onnere Booze uffem Wää.



De kirzeschde Wää uff die Hitt is ohne Froh,
de Kidde enunna, dann sinn mir schon doo.
Doch es war Winda - wie gesaad -
unn de Bersch war aarisch gladd.
Die Zwei mit dem Kieschelschekorb in da Midd
honn wie ma allegaa die Kehr nimmeh gridd.
unn so sinn die Faasekneedele gonz vun allään
vor uns schon de Hiwwel enunna gewään.
Machd nix: Knochehadd gefrornes Eis,
sauwerer Schnee, alles gonz weiß!
Das war fa uns kenn Problem; mit vaänder Krafd
honn mir unser Valornes widder uffgeraffd,
sinn weider dann gezoh bis on die Windabach.
Dort war dann es Enn vun dem scheene Daach!
Das Gesommelde honn mir midenanner gezähld
unn ehrlich unn briederlich gedääld.

Es war wirklich scheen gewään unn e Heidespass,
doch mei Dääll honn isch de Onnere gelass.
Isch honn denne mei Kieschelscher gääre genn,
denn die allerbeschde sinn nur die vun meiner Mamme gewään.



Isch honn dirfe helfe, Johr fa Johr.
Sunschd wäre die jo aach so gudd nie wor.

Das Rezept, wie isch 's noch wüäß

Fa die Füllung!

Die Mamme hadd am vorheerische Dach
aus gedrugelde Quetsche Latwersch gemach,
scheen steif, damit aach nitt zeletschd,
sisch die Füllung aus de Kneedele quetschd.

Fa de Deisch!

De Heebdeisch hadd misse zweimol gehn,
damit er logger war, duffdisch unn scheen.
Die Hänn ins Mähl gedunkd - unn mit aller Krafd
wurd der Deisch donn gekneed unn vaschaffd
bis hin zu äänem dicke Kloß.
Ging er donn leischd vun da Unnerlaach los,
kunnd ma saan, dass em nix meh fähld.
Die Mamme hadd ne donn in da Mitte gedäälld,
middem Welljholz gudd dinn gerollld;
eijo, genau so ham mirs immer gewollld.
Doch dann wars so weid, die Hauptsach kam jetzt –
isch honn middem Läffelsche Latwerschheifelscha gesetzd,
scheen exakt, ääns so groß wies onna,
nitt so dischd, gleischmäßisch ausenonna.
Donn wurd die onna Deischhälfd driwwer geleed,
so dass e huwwelische Lonschafd ennstehd.
Die Buggele genn ausgestoch, middem Glas odda so.
Das ware jetzt die Faasekieschelscha roh.
Uffem Oowe is innem Dibbe drinn
derweil longsom geschmolz es gudde Palmin.
Wenn 's Fett heiß war, so rischdisch erhitzd,
war Vorsischd gebodd, das hadd aarisch gespritzd.
Wie e Stään falle die Kneedele nämlisch ins Eel eninn,
bleiwe unne bis se gonz durchgebagg sinn.
Donn kumme se hoch, duun sisch vun da ään uff die onna Seid leeje
bis se goldgelb sinn, duun sich wenne unn dräaje.
Erschd wenn se die rischdisch Farb donn honn,
holle ma se mim Schaumläffel aus da Ponn,
losse se abdrobbse unn wälze se im Zucker hin unn här.
So e Kieschelsche siehd aus als wenn 's aus Diamande wär.

Denk isch noh all denne Johr on die Kieschelscha vun meiner Mamme,
do laafd ma doch heid nochs Wasser im Maul zesamme.